

TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS

Iha 11 Abril 2016, Governu Timor-Leste hahú konsiliaun obrigatoria ho Austrália tuir Nasoens Unidas nia Konvensaun ba Lei Tasi nian (UNCLOS), ne'ebé Tribunal Permanente Arbitrajen (PCA) mak administra. Liu hosi prosesu ida ne'e, Komisaun Konsiliaun hasoru malu beibeik ho Timor-Leste no Austrália ho objetivu, atu hetan akordu ida kona-ba fronteiras marítimas. Iha 1 Setembru 2017, PCA fó sai katak Timor-Leste no Austrália hetan ona akordu prinsípiu kona-ba elementu sentral ba akordu fronteira marítima ida.

Saida mak konsiliaun obrigatoria?

Konsiliaun obrigatoria hanesan prosesu ida tuir UNCLOS ne'ebé iha painel konsiliador ida asisti parte Estadu sira hodi hetan solusaun amigável ida ba sira nia disputa.

Bele uza prosesu ida ne'e bainhira iha sirkumstánsia hirak ne'ebé Estadu viziñu sira la hetan akordu ida no Estadu ida halo deklarasaun hodi hasees-án husi jurisdisaun orgaun obrigatoria hodi buka rezolusaun ba disputa kona-ba fronteiras marítimas.

Konsiliaun ne'e painel ida ho konsiliador independente nain lima mak halao, ne'ebé ema hanaran Komisaun Konsiliaun. Komisaun ne'e buka atu komprende faktu sira no pozisaun legal husi estadu idak-idak.

Timor-Leste mak nasaun ida ne'ebé hahú uluk konsiliaun obrigatoria tuir UNCLOS.

Saida mak ita atinji ona iha konsiliaun ne'e?

Audiénsia sira: Audiénsia prosesusal dahuluk ba konsiliaun ne'e halao iha Haia iha 28 Juliu 2016. Tuir fali audiénsia pública ida iha 29 Agostu 2016, ne'ebé Timor-Leste no Austrália apresenta sira nia pozisaun publikamente. Audiénsia ne'e fó sai direta husi Tribunal Permanente Arbitrajen (PCA) nia website.

Kompeténsia: Austrália dezafia komisaun nia kompeténsia (legalidade ba prosedimentu sira) durante audiénsia prosesusal ida iha 31 Agostu 2016. Maibé, hafoin ne'e Komisaun desidi ho lian ida deit katak sira iha kompeténsia (ka 'jurisdisaun') hodi rona disputa ne'e no fó sai desizaun ne'e iha 26 Setembru 2016.

Hakotu CMATS: Reuniaun seluk tan halao iha Singapura husi 13 Outubru 2016. Iha reuniaun hirak ne'e Governu Timor-Leste no Austrália konkorda ba pakote medida integradu ida hodi kria kondisaun hodi hetan akordu ida ba fronteiras marítimas permanentes. Hanesan parte ba pakote ne'e, Timor-Leste notifika Austrália iha 10 Janeiru 2017 kona-ba nia intensaun atu hakotu Tratadu Ajuste Marítimu Balu iha Tasi Timor (CMATS), tratadu provizóriu hodi fahe rekursu sira. Tratadu ne'e mate iha 10 Abril 2017. Timor-Leste no Austrália konkorda katak, tuir fali CMATS nia terminasaun, Tratadu Tasi Timor 2002 no nia quadru regulador sei vigora nafatin tuir nia forma orijinal. Ida ne'e sei fó serteza ba investidor mina sira to'o nasaun rua ne'e rezolve ona fronteiras marítimas.

Hapara kazu legal sira seluk: Hanesan parte husi pakote medida integradu ne'ebé konkorda ona hodi loke dalan ba negosiasaun kona-ba fronteiras marítimas, Timor-Leste hakotu kazu arbitrajen rua kontra Austrália iha 20 Janeiru 2017, ne'ebé relasiona ho jurisdisaun fiskal no alegada espionajen durante negosiasaun ba tratadu CMATS nian.

Negosiasaun kona-ba fronteiras marítimas: Iha Dezembru 2016, Timor-Leste no Austrália halo kompromisu istóriu hodi halo negosiasaun kona-ba fronteiras marítimas permanentes ho Komisaun Konsiliaun nia apoiu, ne'ebé fó sai iha Deklarasaun Konjunta ida iha 9 Janeiru 2017. Komisaun halao reuniaun tan iha Janeiru 2017 iha Singapura hodi esplora nasaun rua nia pozisaun kona-ba fronteira marítima iha Tasi Timor ne'e tenki to'o iha ne'ebé.

Akordu Prinsipal: Iha 30 Agostu 2017, durante reuniaun ba konsiliaun sira iha Kopenhagen, Timor-Leste no Austrália hetan akordu prinsípiu kona-ba akordu abranjente ida ba fronteira marítima. Loron ida ne'e iha signifika istóriu ba Timor-Leste tanba iha loron ne'e mós Timor-Leste marka aniversáriu ba dala 18 ba referendu ne'ebé lori Timor-Leste ba nia independénsia. Ho delimitasaun ba fronteiras marítimas, akordu Kopenhagen ne'e haree mós ba estadu Greater Sunrise nian, dalan ida hodi dezenvolve rekursu, no mós buka dalan oin nusa hodi fahe reseita husi rezultadu ne'e.

Saida mak sei halo tuir mai?

Tratadu final: Timor-Leste no Austrália fiar katak sei finaliza komponente importante ba akordu ne'e iha reuniaun tuir mai iha Outubru 2017. Hein katak sei asina tratadu final molok 2017 remata.

Komisaun nia relatóriu: Hodi hakotu prosesu konsiliaun ne'e, Komisaun Konsiliaun sei hato'o relatóriu ida ba Sekretáriu-Jeral Nasoens Unidas nian tuir nia obrigasaun bazeia ba Anexu V UNCLOS nian, ne'ebé fó sai elementu importante sira kona-ba akordu ne'ebé Parte sira konkorda ona.

Oinsa ho Indonézia?

Indonézia la hola parte ba konsiliaun ne'ebé lao hela tanba prosesu sira ne'e só haree deit ba fronteira entre Timor-Leste no Austrália. Rezultadu ikus husi konsiliaun ne'e sei la afeta Indonézia nia direitu marítimas.

Timor-Leste no Indonézia konkorda tiha ona atu halo negosiasaun bilateralmente tuir lei internasional no hahú tiha ona.

Haree informasaun tan kona-ba prosesu konsiliaun nian iha PCA nia website: <https://pcacases.com/web/view/132>

FIXA
INFORMASAUN
Setembru 2017

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



Gabinete
Fronteiras
Marítimas